

皇朝經世文續編

皇朝經世文續編卷八十一目錄

兵政二十勅匪上

議覆葉紹本條陳捕盜事宜疏

論粵西賊情兵事始末

弭盜策

致魏將侯

與大府論會匪書

請通飭修築礮堡啓

上呂方伯啓

致督修礮堡各員紳書

論全楚邊防

諭團練示

上中丞切要事宜

復周鹽道四條議

代劉侍郎與貴東道書

檄鳳穎淮徐滁泗宿海八府屬文代

林則徐

嚴正基

周琛

胡林翼

胡林翼

胡林翼

胡林翼

胡林翼

魁聯

魁聯

魁聯

魁聯

郭崑燾

魯一同

皇朝經世文續編卷八十一

上海葛士濬子源輯

兵政二十 勦匪上

議覆葉紹本條陳捕盜事宜疏

林則徐

竊准部咨欽奉 上諭鴻臚寺少卿葉紹本奏捕盜事宜一摺著各直省督撫妥議具奏欽此臣等查原奏臚列四條如移會鄰封協捕嚴懲牌保容留守望宜責同村審案不累事主此皆申明定例自宜實力奉行况粵省盜賊視他省爲尤熾是以例上另立專條以廣東內河劫案夥聚四十人以上或行劫三次或逃脫二三年後就獲應斬決者均加梟示恭請 王命先行正法誠以海濱蠻野不得不加倍從嚴也臣等竊見廣東弭盜之難別有數端而尋常之弊不與焉一則良盜難分也他省之民良自良而盜自盜廣東不然平時耕種之民遇有貧夜糾劫者但以發財去三字隨路招呼鮮不欣然同往故一同爲盜之人彼此每不相識卽人歎亦無可稽甚至田舍素封衣冠巨族亦皆樂於一試若惠潮地方則竟有以盜起家轉因黨與太多不能破案人不敢指官不得拏者並有通族皆盜通鄉皆盜一拏卽恐滋事不得不略審機宜設法誘獲者此盜風所以未易戢也一則互劫難防也他省之盜只圖得財廣東之盜並因仇起此村往劫彼村此縣往劫彼縣爲盜者並非貧苦竟以挾嫌行強被盜者不卽呈官輒先糾人報復迨事過則彼此互控各匿直情並指局外爲主謀扳富家爲窩主案情變幻歧之又歧此盜情所以未易詰也一則原贓難起也盜案以贓爲憑贓真然後確盜故別省緝盜之法以查贓爲先廣東則盜賊移赴墟場無不立時賣盡及至輾轉售賣大都不識姓名是以歷辦盜案獲贓者少無獲者多部臣查核案情亦皆覆准此係歷久相沿辦法今若必令逐案起贓又恐差保藉端向

當舖衣莊索詐而犯之狡展案之懸宕將因是而愈紛此辦法之未易輕改也一則夥黨難究也訪聞粵東巨盜每先密結親信匪黨發誓拜盟如遇破案到官彼此各自熬刑不相供指即獲正賊嚴訊往往供出同夥非富卽仇雖傳到審虛立時省釋其人業已受累而真夥未經供出聞風轉已遠颺地方官卽設法訪查驟難得手至各縣紳衿中多有攻匪保良之公約不知起自何時其始所保所攻未嘗不當迨久之而漸成袒庇難免黑白混淆臣等惟當諭令禁止以祛流弊此查緝之未易得實也一則花紅難繼也廣東積習官欲獲盜必須先出花紅從前原爲急公迨後竟成常例盜愈著名則花紅愈重若稍吝嗇卽無從購覓線人其有關於官員處分者家屬親隣愈以居爲奇貨卽臣等亦有欲禁而不能驟禁之勢況花紅而外解犯辦罪所費尙多地方官年遇數起盜案賠累多端恐開虧挪之漸此經費之未易措籌也以上各情形臣等惟有隨地隨時力加整頓總必求臻實效不使徒託空言卽如保甲爲弭盜之源而奉行非循故事巡警爲詰奸之要而委用務在得人凡水路之巡船陸路之更練沿邨之望樓保寨均不許有名無實除本年春夏二季獲犯一千三百八十八名已於另摺核奏外仍諄飭水陸文武各員勤益加勤密更求密永冀萑符斂戢閭井安康以仰副聖主綏靖海疆除莠安良之至意

論粵西賊情兵事始末 咸豐四年正月

嚴正基

粵西幅輿遼闊縱橫三四千里巉巖叢嶺林管幽邃所在最易藏姦通計土著十之三四柳慶桂平四郡楚南蠻荒貿易者多粵東間有民人亦略相等閩省差少梧潯南鎮鬱等府州半與東境毗連蠻荒貿易占籍者多係東人閩人閒亦有之土著則婦女耕作男子游手好閒因而各省流寓奸民遇事盤剝取利相率喫喝嫖賭引誘爲非劫掠莽伏之風匪伊朝夕東匪號稱廣馬土著則統名土馬土馬易於制服廣馬奸黠異常事敗則

竄越東境難於緝捕楚閩二省游匪亦不能及土匪中雜有一三廣馬即難擒拏撲滅此西省平日大凡自喫夷滋事以來粵東水陸撤勇逸盜或潛入梧潯江面行劫或迭出南太邊境擄掠旬結本省土匪及各省游匪水陸橫行勢漸鴟張至道光二十七八年間楚匪之雷再浩李元發兩次闖入粵境土匪陳亞漬等相繼滋事小之開角打單大之攻城劫獄寢成燎原之勢此一變也迨三十年十月洪秀全以東人起事金田竄擾潯柳二府陷永安攻桂林長驅而北蹂躪半天下又林十八一股起事粵東信宜率賊眾圍攻西省鬱林被西省兵練擊退回東旋經東省殲滅此二股均崇奉耶穌遇廟槩行焚燬淫掠尙其餘事黨堅交秘覬覦非常其眾聚而不散其用兵詭譎多端非土匪伎倆可比皆所謂會匪也土匪則僅拜臺結會旗幟各編堂名每堂少者數百人多者三四千人不合數堂便已踰萬或分或合專以淫掠勒贖爲事通省無慮數十起飢則盜起飽則遠颺起號起馬散號散馬有自行旋起旋散者有兵勇擊敗而散兵勇撤而復起者有此股甫經撲滅彼股又另起事者幾於無地無之無時無之此變之大者也又三十年九月後粵西因通省羣盜如毛鄭夢翁始調楚南粵東兵協剿李石翁視師周敬翁相繼撫粵又續調滇黔兵丁並募潮勇來西時屆咸豐元年春仲適洪逆凶氣益熾向帥被挫遂專注洪逆一股既而賽相視師添調外省兵勇雲集仍以全力專辦洪逆其南太最鉅之賊則派勞辛翁率壯勇攻擊柳潯梧鬱之賊則派本省弁兵協同有司督帶民練剿辦雖不及洪逆凶狡而賊眾實數倍洪逆加以波山艇匪又自粵東闖入梧潯江面及各府縣小股賊匪均責成地方守令督飭壯練自辦辛翁用計擒斬賊魁顏品瑤以盈萬方張之衆漸行解散分派壯練跟蹤追剿潰入東境者復者會東省道將合攻大局甫定越二年二月洪逆自永安潰出賽相檄催赴省援剿致餘孽猶未盡除嗣洪逆至股竄楚前後來西各省兵勇亦全數追剿出省境內未平之賊并逸盜伏匪生心依然肆行滋擾此又一變也波山

艇匪自元年十月竄西其初止賊船入隻以洪逆尙踞永安大軍環攻未撤乘間勾引土匪散勇附從日繁衆至三四千人船至千餘隻之多橫行左右江面上下攻陷貴縣團困潯郡延至一年七月本省兵壯糾約東省兵壯合勢驅逐至梧州城外大江爲紳帥一舉殲滅復將著名之降盜張劍擒斬江面爲之一清會紳帥視師赴楚沿江兵勇全撤張劍餘黨以復仇爲名又漸次勾結生事南太柳慶伏而未盡之賊鬱鬱境內未平之匪或於東省邀人助亂或於本省糾衆肆劫漸及桂平邊境州縣二年冬季派兵練四出攻擊至三年三月旋滅旋起加以楚鄂九江撤回之勇腰閒金盡所至陸續入夥通省數千里上下又無處不時有警報會城亦嘗戒嚴興安之變通縣舉貢生監拜臺結會爲逆於五月攻陷興安分衆襲攻會城幸有畏罪悔禍者暗通被困未死之蔡令集衆反正擒斬首逆寢事不然桂林幾不能保此一奇變也粵西被賊州縣均有團練若鬱林州及所屬博白并南郡之橫州潯郡之貴縣尤爲勁勇著聲次則北流桂平平南賓州河池賀縣等十數州縣亦稱敢戰賊非大隊不敢入境而其風氣之最不足恃者則莫若南甯之宣化一縣地大人繁內有守正急公者卽有豪賊營利及出境行劫者陽託團練之名陰行鬼蜮之私爲本邑正經團練紳民所不齒有司利其在境無事兼以人衆且悍不敢輕動因卽以團練虛相羈縻辛翁駐軍南郡此輩窺我壯練強盛稍爲斂迹聽命及帶壯赴援桂林逸匪復出劫掠又復爲之囊橐收納近知經費支絀有不能僱壯公然修怨鄰村與本境團練爲仇因而向不爲非村衆懼無官府之助其惡少逐漸拜臺結會殿室之被鄰匪搶掠者亦卽聽從出村報復自思太以及柳慶均已漸染此風又柳慶上年旱蝗過重一二不逞之徒倡亂飢民隨從搶奪比比而然此又一奇變也粵西額征錢糧通計四十萬有零本省綠營兵餉歲需四十二萬餘兩既屬不敷其闕料雜稅不及十萬餘兩支給文武員弁廉俸及祭祀書役工食等項亦多短絀常年徵收足額尙須外撥接濟近年盜賊充斥

人民離散除觸緩外完納不過十之五六愈形不足前此鄭夢翁撫粵因國帑日絀憚於奏撥兵事初興爲因循敷衍之計李石翁亦不敢多有調撥周敬翁入向提帥之言多調外省兵丁大請餉項思爲一舉蕩平之計賽相來西視師復添調外省兵丁廣募粵東壯勇專注洪逆一股源源請撥兵餉急圖殲除此起凱撤回京所用烏向二帥均屬可倚立功但惑於左右之言駕馭乖宜使烏向同事不協均不能盡其用以致洪逆潰圍而出難以收拾維時洪逆雖已離粵羣盜尙多嘯聚已撥未到之餉胥爲楚省截留備支入楚大營洪逆屯聚道州數月閒道距桂林不三日程會城仍未解嚴省內外防剿兵壯鄉練均不敢撤需費浩繁司道庫貯爲之一空嗣後以楚吳賊盛用鉅又不敢昌言請撥閒有撥餉到省隨到隨罄馴至今日卽本省兵餉并不能按季散放而通省賊繁備多挹注無術顧此失彼遂成不可救藥之勢此又一大變也粵西地瘠缺累州縣不能贍給者十常三四而省會大吏向有闕料盈餘津貼不至督責州縣供應是以簞簋不飭之習在於上游尙少因是州縣亦敢明目張膽婪索較之楚省稍優而吏治之不飭則由於十數年前院司以文酒徵逐爲豪舉於地方懲辦盜案之員目爲俗吏或加之擯斥有司諱匿不報遂至盜勢益張涓涓不塞終成江河厥有由來近年左右江面不靖關稅短缺大吏亦不能自給州縣疲憊日甚軍興時藉公濟公尙可支持今請領無款支發盜多民困徵糧則民多抗欠失事則官卽逮禡州縣不顧到任視事每下檄嚴催始行登程民不聊生官亦不聊生可爲太息安得耐苦耐勞視民如子若干清端公治羅城者參布州縣賣刀買犢賣劍買牛庶其有豸此又一變也西省辦理團練各府廳州縣城內均設總局其四鄉亦有分局省會則又另設總局均遴選紳士以司其事省局則又受通省總局之成而加重焉大約得公正廉幹者專司局務於講求結團集貲之事必周於臚舉出力請獎之人必允議事而衆樂從賞一人而衆知勸求之省內外局紳中殊不乏人而亦有私其親屬戚友

不必盡以勞績得官既爲人所訾議且有持吏長短以愛憎爲是非尤爲公論不與者此又一變也

弭盜策

周琛

盜有愚民有奸民有習於兇獷之民有迫於飢寒之民善弭盜者未事而先爲之防已事而嚴爲之處分類而用法懲一以戒百其條有八可約舉之一飭防汛州縣能緝已形之盜不能緝方形之盜捕役能捕已發之盜不能捕未發之盜營兵防汛計里分置備器械勤巡邏修墩臺明斥堠盜發於疎略密則息盜乘於弛防豫則銷止劫之法莫先於此一開糾告以兵攻盜勢順而易漢張敞拜膠東相令羣盜相捕斬者除罪而盜遂息其明驗也一剔窩藏盜之來去無常窩之盤踞有定盜之蹤跡多秘窩之屯聚易明治盜必先清窩無窩豈復有盜明蔡忠襄備兵嘉湖搜剔窩主浙西數十年所以無患也一分誅散盡誅則不可勝窮解散又恐其復聚郭伋守漁陽戮其渠帥張詠治蜀郡散其脅從恩威並用剿撫兼施而後盜可弭一聯守望兵出則盜逸兵去則盜出兵能攻負隅之盜兵不能止行蹤無定之盜徵調以禦之勞師而無功召募以禦之糜餉而無濟官軍不如鄉團練勇不如練志一方之中合一方爲一團一鄉之中合衆團爲一團患難相顧生死相恤內盜不能容外盜不能入魏李崇爲兗州刺史村置一樓樓皆懸鼓盜發則擊以次相傳頃刻百里無不赴應盜無匿者後諸州皆效之自崇始也一實稽查欲治外盜先清內奸懸十家牌於門首名曰稽查實具文也屬其責於吏役挨戶稽查又擾民也官查不如民查專查不如互查合查不如分查得王文成保甲糾察之法行之則內奸可屏一廣儲積驅飽煖之民爲盜民不應也強飢餓之民使不爲盜民不從也王式討裘甫而先開屯倉所以散有形之盜朱子令各鄉置社倉所以弭無形之盜歉年有備盜風自息一擇守令邱瓊山先生曰遠方之民所以易動者非民之性習然也治之者不得其人也得一良令如得勝兵三千人得一良守如得勝兵三萬人蓋

得守令則能安民能安民則民自不爲盜此尤正本清源之論也凡此數者行之以實意而不粉飾於虛文善之以治人而不專求夫治法無騙民爲盜之政有化盜爲民之忱萑苻之患不足平也我 朝治邁前古民康物阜之休不當駕三代而上之哉

致魏將侯庚戌

胡林翼

三月十六日將曙時清江顧倖鈔寄鎮遠朱甲翁及閣下所言天柱黎平開泰清江匪徒情形通稟稿稿內所言匪徒結拜弟兄聚集百十餘人擄劫村寨持有火槍又稱在黎平開泰之皮所在瑣龜尾溪又稱須再查何屬之地卽此可見閣下於此情形尙未深悉如稟稿業經徑發則禍患方始若猶未也尙可從容謹逐條開陳以備甲翁及閣下之採擇焉一楚匪入黎境弟於二十日到黎平其時賊擾於外兵譁於內言利則勇赴敵則怯欲安內乎欲攘外乎禍患之萌不僅禦侮之難也幸賊於二十三日竄出而兵亦漸定卽此可見不教之兵將有不戢自焚之勢遑問殺敵致果耶此時賊去漸遠而兵不能撤糜餉帑而誤農功卽楚匪一事而官民已焦爛不堪矣若再言用兵則兵連禍結將無了時其弊一也一凡辦事不外孟子天時地利人和三端言天時則農功方始蒲杏初開用兵則誤農民食旣虧本實先撥已亂者未知何日蕩平而未亂者方且竊起生變此則天時之不可也言地利則閣下及鎮遠朱甲三黎平淡海珊均到任未久恐要隘形勢尙未周知此拏彼竄朝東夕西賊行如鼠兵行如牛以牛捕鼠必不可得兵少則必拒兵多則必逃勞師糜餉終無了時昔馬新息聚米爲山虜在目故能得隴望蜀其征五溪蠻則地利不得其要故功效遲而讒慝因之而起伏波尙如此況我輩乎弟於革夷山丙之事上年閏四月著事至八月交卸畫圖將及百幅攷證察訪將盈百人故於要隘之處險僻之區土人所不悉者弟已盡知之正月初六日約期而會分布周匝實已得其要領然猶不免竄逸

也猶不免曠日持久也此地之東西南北弟且不悉卽朱浚兩郡守亦恐未悉矣奈何輕言大舉此地利之不可也籌商合辦卽使人人有必操之勝算尙恐臨事有誤況未必能如我意其調兵以助聲威則將官以下必須選擇而後行意中可用之官弁有幾人耶此人和之難其弊二也一執事所言之匪徒卽黎平之郭繼明姜大五等數人糾約羣盜正月間曾投楚匪疑而不收每人給錢二百文旋即散去此時黎平大兵雲集該匪亦驚疑奔竄所以潛至清江天柱邊界固非清江之匪也鄙意此等匪徒本是盜賊非真能叛逆也緩之固難圖急之則生變其理易明此時楚匪若剿滅無遺則該匪亦聞風落膽若以不教之兵不習之練不熟悉地形之官吏猝而乘之萬一賊匪得志則膽氣必張禍患方始鄙見軍務之後若輩必散歸原巢留備賞需銀兩密囑地方官設法擒治卽每名賞及千金猶較大舉爲得計爲省費況不需千金耶且殲厥巨魁則餘匪不足平也若拏辦而不得手竄楚竄粵是將授人以話柄其弊三也一辦事必先自度必勝而後稟聞請示更須量同辦事者之均可必勝而後會合大舉此次若徑稟大憲在中丞在本省鎮靜安詳必有先機指示之處設非中丞之鎮靜安詳或據情入告或親自督辦彼時問原稟者要賊何以應之勢必強殺數人冒功虛報以爲了案地步其貽害於民生國計何窮其弊四也一辦事不外用兵用民用役之三途兵不可恃無智愚皆知之新任之官恩信未孚民不可恃黎平府無幹差天柱尤甚且恐其與盜通情則差亦不可恃姑再遲回物色綽日久之必可得手又於暇時選擇武弁聯絡鄉民挑選差役則三者又均可化無用爲有用若急切用之徒然僨事其弊五也一此次藩庫已形支絀而營弁仍多缺望若藉此軍需以辦盜案其費不少不如留此經費以交地方官臨時購募費半而功倍矣蓋捕盜則支應可省而軍需則應接不暇且驕縱異常其弊六也一凡辦事首在得人尤須持重譬之李廣射虎度不中不發迺能除盜乃能用兵此等盜匪其著名者無多若地方官盡心盡

力必可設法擒之但恐不誠心耳誠則金石可貫鬼神可通不比革夷山丙之負險不服兵差不敢入其巢穴也若輕舉妄動設使傷官傷兵則賊餒必然頓起此地處處與楚粵交界一時不能了辦楚粵受其擾害則愈裏愈多楚中入奏粵中又入奏責備歸於黔省是又楚匪之續耳其弊七也一地方之事以十萬兵而不足者以一二良吏爲之而有餘卽如湖南會匪始事其巨魁不過三五人若得一二循良之吏了此數人何至貽害若此又如永昌之事其始不過羣盜耳因地方文武不得其要領不別其良莠始則輕躁而以賊爲戲繼則退縮而懼寇如虎其無事之時見罪囚則涕泣不食一味寬縱若至仁者其有事之時則縱兵殺民以當賊若至勇者宜其愈逼愈多永昌爲十年之害新甯爲三省之害我省當以此爲戒若不設法用計老成持重一舉不勝害及十年禍連三省其弊八也總之此賊因未卜楚匪成敗如何故觀望遷延相聚爲盜耳若楚賊既滅此盜必散散則設法擒之每巨盜一名以一千金購之亦屬有益緣巨盜有限而餘匪又不值一購也若大舉則未見其益通稟尤萬萬不可行愚見如此以執事胸有千秋愛國愛民望度力而審行必養威而持重卽使將來購擒未獲而處處留心則人心既孚地形亦熟俟農隙之際尙可審定會辦也

與大府論會匪書 咸豐元年辛亥

胡林翼

黎平會匪最多古州永從丙妹尤甚有言會匪總頭收盜匪爲爪牙者有言會匪從湖南寶慶衡州來者有言古州多粵人會從廣東來者且言實繁有徒兵差一氣者其盜匪有老冒老三哥大五大六大九爲之渠魁其編號從大一至大十小一至小一以湖南紙牌之字爲燒香拜會之號此則確有可據者也愚以爲楚粵遍地皆是然有會匪而不爲盜者無大盜而不拜把者有會而不盡爲匪者無匪而不拜會者刻下湖南四川奉密旨訪拏然而不可輕動者何也武備之弛兵氣之弱 國帑之支絀人心之浮僞怯懦實非旦夕所能挽回

設使辦理不善禍端一發不可收拾轉不如暗爲轉移之爲得計暗爲轉移之計莫先於除盜懲貪國家之敗由官邪也自來西域臺灣達州起事均因官吏貪污會匪得以藉口川省之惡戴如煌而譽劉青天近年新甯因貪吏李博平羅勒價二千文一石次年差役訛詐雷再浩之妻黨以致李元發又復倡亂桂平韋正因謬懸登仕郎區額疊次訛詐因而倡亂僞稱爲王前此固羨慕登仕郎而不可得者也挺而走險誰爲厲階是會匪極多之地如得廉吏主持必不致釀成事端卽無會匪之地而以貪吏混跡則平民亦可釀亂明季張李之亂豈盡拜會者乎其次莫如除盜盜匪多强悍敢死之人會匪必借其力會匪多深險不測之人盜匪必資其計然使翦其爪牙則會匪亦弱愚以爲不必計其爲匪爲會惟有盜案者必殺無赦則盜平而會亦消卽明知爲盜匪中之會匪亦止究其爲盜爲匪而不必問其爲會則可安反側之心而消無窮之禍若鹵莽訪拏將良懦就擒而渠魁兔脫兵差滋擾而閭閻騷然勢必簧鼓其餘黨以倡亂萌國計民生兩有所損惟實在辦事者不可居辦事之名不可惜辦事之費尤不可無了事之心則大局均有裨益

請通飭修築碉堡啓

胡林翼

粵西兵勇六七萬人皆選募於各省其隨行餘丁夫役各色人工計又不下二三萬人費帑已逾千二百萬兩兵力餉項不爲不厚然而圍守永安之日終日挑戰闖六七月之久而賊終不出所報斬獲豈盡實耶永安竄逸之後無戰不敗將星動搖侵軼省城勢更猖獗兵將之勇敢者多已傷亡餘人膽落怯不任戰告急於粵東而粵東多寇饑饉不繼楚省自保不暇救援之人宏濟之略相顧不發一策專待廟算而後行又不實力遵奉以慰宵旰是粵事直不可問城守半月條理當密明李瞿公起田極言桂林形勢可守或竟無虞而大勢終不能濟然則粵事之失其非不足於兵練明矣驅怯戰之兵日日浪戰以冀幸其一勝軍興三年無一人深

入賊營探其虛實賊營動靜無能知者亦未聞設一奇策引賊入設我 太宗文皇帝天縱神武無戰不設伏無戰不用閒其於阿山葉赫薩本哈頭攻城奮力不令再攻今粵西乃棄民以嘗賊以此求功竊所未喻其失一也久治之世兵民晏安成習心志不苦患難未嘗則智慧鈍而膽力怯一盜夜呼千人皆廢彼小事且然况大寇耶粵軍兵將臥耽鴆毒卽無疾病亦半委靡選將不精束伍不定以此言戰何恃不恐以此言兵雖多奚爲其失二也威南塘選兵不用城市而用鄉農用意最精愚見以爲召遠方之惰民以充練不如卽本境之農民以自守今粵西之練數多於兵馳檄遠募游手惰民盡入籍中坐廢歲月漫無統領一旦餉絀職爲亂階近聞案賞而後言戰交綏卽退並有輸情通賊者其失三也田疇許遠尙保鄉里塵埃之中何地無才何才不可策用惟官不先用則傑者思亂懦者風靡耳永安之民如不通賊何能接濟七月之久陽朔荔蒲如能浚溝築堡何能直犯桂林古東之敗如得土人指引協助何致全軍敗衄惟官不用民而民乃爲賊用此機一失禍患無窮其失四也黔中與桂林最近者惟黎平爲甚近日各屬傳聞不一稟牘頻來卑府日夜籌思設卽調兵三千勢已極弱然黔省核實每月卽需銀萬二千兩每年須銀十五萬兩以黔較粵兵力尙不及十分之一粵不能戰何望於黔招練過多恐亦非策粵防奏凱不知何時經費之計就目下而論粵爲充盈黔爲支絀彼費至一千二三百萬兩而終成虛擲黔中豈能辦此是爲黔計者又不必從調兵設想可知矣愚以爲天下之勢必匿其所短然後能用其所長兵民之怯戰久矣言戰不如言守用兵不如用民用民力以自衛尤不如先用地利以衛民破天下之至巧者以拙馭天下之至紛者以靜公輸之善攻不敵墨翟之善守譬之於棋負者誤於進取勝者以慎守爲算其切喻矣熊公襄愍經略遼瀋惟扼形勢繕守具主固守不浪戰身之去就係遼存亡然考其方略不過築堡插柳以防衝突盧公忠烈督兵大名邯陽依險立寨築土垣以保民流賊遇公必敗所

至飢渡川楚教匪嘉慶二年德侯奏請堅壁清野合州興牧所陳調兵之害添兵之害鄉勇之害及四難十利各策其時以糜費擾民之說阻隔不行而糜餉擾民尤甚至額侯經略川楚於六年內復奏奉行立見功效乾隆之季楚苗不靖福和兩帥以重兵剿辦不勝而傅公重庵創立礪堡以制之鎮守總兵富公志那償司事者之歲費金錢妄爲招撫遂以參苗之資歲十餘萬畀之傅公以成設礪之功楚人至今賴之治安已近六十年此近事之成效可考者也又王莽傳載田況所陳平盜之策言盜賊情狀將帥不能破賊擾害州郡妄殺良民各情無不切中今日之病其言收合老弱積藏穀食并力固守賊攻不能下所過無食剿之易滅招之易降又深似嘉慶六年以後堅壁清野情形蓋其所謂徙老弱於大城者卽後世之堡也李牧備邊收民入保終不亡失是卽築堡設礪之始事合觀古今之勢大抵開創之始此策可不必行蓋亂極思治之日人心物力爲之一變其堅定純樸能耐勞苦壯膽智少嗜慾則不僅在朝之將帥官吏爲然卽在野亦然李牧爲周季之人熊飛百盧建斗爲明季之人惟德侯額侯傅公之策翼牧之議處乾隆極盛之後目觀人心日安於便利未嘗艱難非此不足以救民水火耳本日據魏令王署令韓委員超劉委員毅馳稟南路最要之八樂靠頭四堡大勢已成民苗亦知自衛身家同聲踴躍成當不日而卑府查閱地圖凡與粵界之處約一百餘里以河流三大支爲界由遠及近由外及內均當一律次第辦理日役土木竹石鐵工千數百人其章程款目則取法於前而稍變通其堡中防守之具大槩與城守相類其堡外靜僻之處或剷削以杜人跡或旌施以示聲威或巡徼以絕窺探守禦果定則扼要爭奇當可於守中言戰也

上呂方伯啓

胡林翼

再者細揣盜賊之情狀兵練少而弱浮靡不整者賊見之必抗非馭兵者之過此挑練不精之過也似尙有法

可施請勿過慮惟捕盜與剿逆互有難易逆則患其抗而盜則患其匿耳官無久駐之勢盜有暫伏之技此剿辦之所以不能得手也前言保甲團練者所以防竄匿卽所以輔雕剿之不及保團可禦畸零奔潰之賊已敗已散之賊而不能當大股方張之賊專精雕剿又所以救保團之所不及二者缺一不可細思賊勢如此林翼何能坐待保團之成而始議動手卽使地方官保團不力又何能推過於地方官且黎平保團盡心一年有餘無日不討國人而訓之成效尙不過四分五五分六分能自謂已精已善乎然總勝於不辦者總勝於徒恃文告者卑府受命委辦荷國士之知恨不卽時掃蕩盡符所以再四乞辦保團者實以保團非一手一足之所能兼又且非其官長則令不行而禁不止讀請再四豈欲以口說侈陳於上憲哉實見賊狀必歸於竄匿耳昔趙壯侯金城平羌主臣辯論往返不已卑府才識至庸何能妄爲援引然愚者千慮或有一二可備採擇之處尙祈明察並乞節取迭次稟詞稟陳兩院則於地方實有裨益

致督修碉堡各員紳書

胡林翼

潛山近舒近霍之山險邊隘已專懇樹人兄同朱君蘆溪柳君銅章督率潛山各局員趕緊興修凡霍山之山險邊隘應專懇會亭幹臣桐封督率各堡各局趕緊興修乃英山邊隘已請秩九同選鋒營哨趕緊興修其法以邊牆爲要以碉樓爲主不築礮臺碉樓卽空心小礮臺也其碉樓圖式卽照從前抄寄之件妥速遵辦其上一層則以灰包火藥包石塊鑼鼓梆爲用中一層下一層則以擡槍鳥槍爲用並會亭營中新造三叉架短式槍亦儘合用如可多造卽由會亭開鑄造一百桿以便發給各碉由會亭弟稟請發價可也守法平日十人臨警三十人積五日水米於碉中由局紳管理此萬全之策也其程限均以接信十日起限稟報地勢及興修起手日期看定一處卽趕辦一處餘均陸續稟報其作碉作邊牆之物料如石塊石灰樹木工役等項均由士民

自損其成功速而堅實者由樹人兄會亭弟秩九兄三君子稟獎先賢以銀繼則奏獎也守備之修所以濟兵力之窮而士民之身家又足自衛務乞諸君子妥速辦理並諄諭士民使曉然於有備無患之義倡率捐辦實爲至要

論全楚邊防

寶慶府知府 魁 聯

竊逆匪攻撲全州圖竄永州疊經差探馳報並恐該匪聲東擊西飄忽不測移催代辦都司篆務新平營守備方開榜速赴新甯協防并移屬張署副將嚴堵由全州入新甯要隘其郡城一切由卑府督率練勇巡防并抽調白毛坪練勇派趙縣丞管帶馳駐武岡四路策應一面由卑府飛諭預募待調之武岡渡頭洞口老潭三團壯丁六十名協同巡防均經次第稟報在案茲據初十日遣丁自全州齎回探報賊前隊已抵黃沙河後隊尙在全州攻城又分一股在東安柳鋪渠將市鎮燒燬勢甚猖獗又有一股分撲灌陽等語查逆賊雖有萬餘其精壯者不過二四千人卽分數股則每股二三千精壯者不過數百果能各守各隘屹立不動賊到處不利其勢自蹙爲今之計似宜先將全楚邊防籌一萬全大局查賊匪由粵入楚之路最要者東安零陵永明江華新甯城步六縣零陵永明江華則以祁陽爲咽喉東安則以祁陽邵陽爲咽喉新甯城步則以武岡爲咽喉賊在全州則零陵東安新甯三縣相隔僅數十里爲尤要似宜飛檄各將弁堵截要隘不許退縮一面整頓精兵千人於祁陽以壯聲援而資策應邵陽南路緊連東安景都司今日到郡卑府現已移囑該都司酌帶弁兵駐劄五峯鋪花橋接壤地方爲東安聲援武岡現由卑府飭派趙縣丞帶勇駐劄策應由東安城步新甯犯寶慶者督練勇策應會營堵截由零陵等處者祁陽駐兵策應堵截楚邊層層向外堵截粵兵步步跟蹤追剿閭閻不致震驚賊勢立可蕩滅但須示諭兵勇專擊賊匪精壯於其老弱婦女姑縱勿殺使賊始終自受牽制一面多

籌經費使口糧應期給發兵勇得以飽騰并不惜重賞以鼓舞其敢死之氣

諭團練示

寶慶府知府魁聯

照得團練章程久經本府刊示曉諭粵西逆餒張皆民間先未團練之故蹂躪之慘爾士民皆已聞知計釜底游魂不日即當剿滅郡屬密邇粵疆沿邊一帶均經本府嚴密布置倘有警急本府即當親帶練勇會帶營縣迎頭截剿斷不使邊民受匪徒驚擾惟本府保護地方尚且不遺餘力爾士民各有身家豈可不居安思危力行團練爲有備無患之計特將前示章程按切今日情事酌定簡明條規則切申諭各士民務各乘茲閒暇急早綢繆已行者務益加精密未行者速實力奉行慎勿視爲老生常談自貽伊戚所有章程列後

一團規因地制宜 或都或村或甲或廟或族小團數里大團數十里各視其地所宜總以聲勢聯絡爲主每團設立副團長各一人不拘紳耆士庶公舉明白事體素敦信義者爲之視村甲戶口多寡每家出一人或一三家輪出一人以爲團丁悉聽團長管束其姓名登記簿冊交團長收掌聽本府隨時調查不願身爲團丁者准其雇募強壯妥實之人自代不准以孱弱及外來遊民充數推避阻撓者准公同稟官究治

一預先扼要守險 依山傍水狹隘崎嶇者爲險通衢徑路往來必經者爲要扼要之處皆可以人力設險或築礮堡或築墩臺或深挖坑塹上設活橋以渡行人一旦有警去橋而守鋪市則多設木柵事無定法總在平時留意體察則臨事自不致周章

一壯丁練習技勇 藝高則膽大有衆而無勇與無衆同凡各團丁務操習技藝無論拳棒各項器械以及跑坡越澗飛石各就所長均可演習倘習有成效許團長稟請本府親臨校閱定將督率管教之人及技勇超羣者從優獎賞其器械亦須預先備用安置停當方可倉猝應用號令亦須預先議定家置銅鑼或木梆有